

采芳隨筆卷十二

北平查 彬伯墊輯

蓮花潔品也即芙蕖花爾雅云荷芙蕖一作扶渠一作夫

渠一名荷花一名水芙蓉又名草芙蓉一名水芝按蕖菜茨

實俱名 一名水芸一名澤芝一名水旦一名容華一名

水華一名菡萏已發為芙蕖未發為菡萏詩正義云菡萏一作荇蔞 又號玉環張

敏叔以為淨客曾端伯以為浮友又呼淨友稱之曰水

花魁比之則曰花君子唐明皇指為解語花又有梅弟

凌波仙妙法華等曰花經蓮花三品七命花惟紅白二

色窈多白者香紅者艷華實齊生百節踈通有重臺蓮

並頭蓮

一名嘉蓮 一名華萃 一名同心蓮 一品蓮 三本 四面蓮 周

共四 灑金蓮 金邊蓮 衣鉢蓮 千葉蓮 黃蓮 金蓮 分香蓮

分枝荷 一名低 夜舒荷 一名望 紅蓮 睡蓮 四季蓮 等目

他如佛座蓮 金鑲玉印蓮 斗大紫蓮 碧蓮 錦邊蓮 諸品

尤為絕勝 漢昭帝時有紫色芙蓉 蕪環詩有緗荷 即今

神境記 九疑山有黃色蓮 北夢瑣言 湖州有青蓮 佛書

云 芬陀利花 白蓮花也 優鉢羅花 青蓮花也 波頭摩花

赤蓮花也 學圃餘疏 蕪州有百子蓮 碧臺蓮 拾遺記 周

穆王時有冰荷 霍光有五色睡蓮 南海 宋興國玉津園

有合歡之瑞蓮 太華峰有玉井蓮 洞冥記 釣影山有紫

河中有寒荷一統志儋州有四季荷臘月尤盛枕中書
玉京七寶山芝沿中蓮花徑度十丈關令尹喜生時其
家陸地生蓮花又皆蓮之異種也荷葉曰翠蓋蓮實曰
的藪一曰玉蛹一曰葇又名湖目又名藕實房曰青房
藕名雨草一名白藕一名玉玲瓏一名玉臂龍一名西
子臂鬚名佛座鬚荷葉可以為衣通柄盛酒名曰碧筒
杯以杯置花中飲之名曰解語杯周子愛蓮說有云予
獨愛蓮之出淤泥而不染濯漣漪而不妖中通外直不
蔓不枝香遠益清亭亭淨植可遠觀而不可褻玩焉樂
天荷珠賦句云灑之不著湛子逾淨時寄寓於傾歌每

因依于平正可止則止必荷之中央在圓而圓得水之
之本性梁沈休文約新荷應詔云勿言草卉賤幸宅天
池中微根纔出浪短幹未搖風寧知寸心裏蓄紫復含
紅吳均採蓮云錦帶雜花鈿羅衣垂綠川問子今何去
出採江南蓮遼西三千里欲寄無因緣願君早旋反及
此荷花鮮隋辛德源詩云洛神挺凝素文君拂豔紅麗
質徒相比鮮彩兩難同光臨照波日香隨出岸風涉江
良自遠託意在無窮唐盧昇之照隣詩云浮香繞曲岸
圓影覆華池常恐秋風早飄零君不知王子安勅採蓮
曲云採蓮歸綠水芙蓉衣秋風起浪鳧雁飛桂櫂蘭橈

下長浦羅裙玉腕輕搖櫓葉嶼花潭極望平江謳越吹
相思苦相思苦佳期不可駐塞外征夫猶未還江南採
蓮今已暮採蓮花渠今那必盡娼家官道城南把桑葉
何如江上採蓮花蓮花復蓮花花葉何稠疊葉翠本羞
眉花紅強似頰佳人不在茲悵望別離時牽花憐共蒂
折藕愛連絲故情無處所新物徒華滋不惜西津交珮
解還羞北海鴈書遲采蓮歌有節采蓮夜未歇正逢浩
蕩江上風又值徘徊江上月徘徊蓮浦夜相逢吳姬越
女何事茸共問寒江千里外征客關山路幾重太白古
風云碧荷生幽泉朝日艷且鮮秋花冒綠水密葉羅青

烟秀色空絕世馨香竟誰傳坐看飛霜滿凋此紅芳年
結根未得所願託華池邊又採蓮曲云若耶溪傍採蓮
女笑摘荷花共人語日照新妝水底明風飄香袂空中
舉岼上誰家遊冶郎三三五五映垂楊紫駟嘶入落花
去見此踟躕空斷腸戎虔州昱採蓮曲云雖聽採蓮曲
詎識採蓮心漾槫愛花遠回船愁浪深烟生極浦色日
落半江陰同侶憐波靜看妝墮玉簪劉河南方平採蓮
歌云落日晴江裏荆歌艷楚腰採蓮從小慣十五即乘
潮李公垂紳重臺蓮云綠荷舒卷涼風曉紅萼開繁紫
萼重雙女漢臯爭笑臉二妃湘浦竝愁容自含秋露貞

姿潔不曉春妖艷態穠終恐玉京仙子識却持歸種碧
池中郭煥威詩云臉膩香薰似有情世間何物比輕盈
湘妃雨後來池看碧玉盤中弄水晶昌黎句云從今有
雨君須記來聽蕭蕭打葉聲張承吉句云摘蓮拋水上
郎意在浮花姚秘書合詩云露荷迎曙發灼灼復田田
乍見神應駭頻來眼尚顛光凝珠有帶熖起火無煙粉
膩黃絲蕊心重碧玉錢日浮秋轉麗雨灑曉彌鮮醉豔
酣千朶愁紅思一川綠莖扶萼正翠葯滿房圓淡暈還
殊衆繁英得自然高名猶不厭上客去爭先景逸傾芳
酒懷濃習綵牋海霞寧有態蜀錦不成妍客至應消病

僧來欲破禪晚多臨水立夜只傍堤眠金似明沙渚鐙
疑宿浦船風驚叢乍密魚戲影微偏穠彩燒晴霧殷姿
擷碧泉畫工投粉筆宮女棄花鈿烏戀驚難起蜂偷困
不前繞行香爛漫折贈意纏綿誰記江南曲風流合管
絃義山詩云都無色可並不奈此香何瑶席乘涼設金
羈落晚過迴衾燈照綺渡襪水沾羅預想前秋別離居
夢擢歌飛御詩云綠塘搖艷接星津軋軋蘭橈入白蘋
應為洛神波上韞至今蓮蕊有香塵又張靜婉采蓮曲
云蘭膏墜髮紅玉春燕釵拖頸拋盤雲城西楊柳向嬌
晚門前溝水波粼粼麒麟公子朝天客珂馬璫璫度春

陌掌中無力舞衣輕剪斷鮫綃破春碧抱月飄煙一尺
腰麝臍龍髓憐嬌繞秋羅拂水碎光動露重花多香不
銷鷓鴣交交塘水滿綠萍金粟蓮莖短一夜西風送雨
來粉痕零落愁紅淺船頭折藕絲暗牽藕根蓮子相留
連郎心似月月易缺十五十六清光圓李文山羣玉蓮
葉云根是泥中玉心承露下珠在君塘下種埋沒任春
蒲又新荷云田田八九葉散點綠池初嫩碧纔平水圓
陰已蔽魚浮萍遮不合弱荇繞猶踈半在春波底芳心
卷未舒吳子華白蓮云白玉花開綠錦池風流御史報
人知看來應是雲中墮偷去須從月下移已被亂蟬催

晚晚更禁涼雨動襜褕習家秋色堪圖畫只欠山公倒
接籬賈暮芙蓉出水云的皪舒芳艷紅姿映綠蘋搖風
開細浪出沼媚清晨翻影初迎日流香暗襲人獨披千
葉淺不競百花春魚戲參差動龜遊次第新涉江如可
採從此免迷津陸魯望詩云閒吟鮑昭賦更起屈平愁
莫引西風動紅衣不耐秋又白蓮云素蘂多蒙別艷欺
此花真合在瑤池還應有恨無人覺月曉風清欲墮時
又白芙蓉云澹然相對却成勞月染風裁箇箇高似說
玉皇親謫墮至今猶著水霜袍皮襲美重臺蓮花云歌
紅矮婧力難任每葉頭邊半米金可得教他水妃見兩

重原是一重心崔湘颺櫓白云留樣最嗟無巧筆護香
長為惜薰籠劉魚蓮塘霽望詩云新秋菡萏發紅英向
晚風飄滿郡馨萬疊水紋羅乍展一雙鷓鷯繡初成採
蓮女散吳歌闋拾翠人歸楚雨晴遠岸牧童吹短笛蓼
花深處信牛行孫光憲採蓮云菡萏香連十頃陂小姑
貪戲採蓮遲晚采弄水船頭溼更脫紅裙裹鴨兒宋楊
大年詩云翠幄飄香映綺襦鈿盃清曉露成珠休啼為
近鮫人室欲笑誰投玉女壺雲氣乍迴巫峽夢水嬉猶
記曲池圖金花却薦何人步枉遣凌波鞦韆濡又白蓮
云昨夜三更裏嫦娥墮玉簪馮夷不敢受捧出碧波心

又詩云舒女清泉滿黃姑別渚通巴天迷峽雨楚澤映
江楓思逐鮫絲亂香愁翠被空灑從瓊蕊露吹任石尤
風怨淚連疎竹私書託過鴻雙魚應共戲休問葉西東
錢思公惟演詩云欲網珊瑚碧浪深橫塘斜日帶秋陰
漢宮此地留金餅洛浦何人遺錦衾舞學西城回雅態
歌傳南國有餘音韓憑恨魄如長在青骨香銷亦見尋
又詩云唾露金銷月似霜雲屏玉輦剩秋光不知惟有
高唐夢翠被華鐙徹曙香又詩云水濶雨瀟瀟風微影
自搖徐孺羞半面楚女妬纖腰別恨拋深浦遺香逐畫
橈華鐙連霧夕鈿合映霞朝淚有鮫人見魂須宋玉招

凌波終未渡疑待鵲為橋丁晉公謂詩云夢散高唐夜
正遙楚天何處不無慘秋風似會荆王意露渚煙汀養
細腰胡武平新荷云一夜抽輕蓋平明映曲池水涼魚
未覺烟淨鳥先窺露重心猶卷風多柄尚危東林應結
社只待素華披杜祁公衍詩云鑿破蒼苔漲作池芰荷
分得綠參差曉開一朵烟波上似畫真妃出浴時又雨
中荷花云翠蓋佳人臨水立檀粉不勻香汗濕一陣風
來碧浪翻珍珠零落難收拾韓魏公詩云清香奇色匝
芳洲只得公餘一見休道是好花堪謔問幾時曾上美
人頭又滎歸堂觀蓮戲成云風捲蓮香不斷頭田田荷

影動清流紅苞密障魚鷹坐綠蓋低容水馬遊時折嫩
梢供玉箸更裁圓葉代金甌何如滿艦傾醇酎醉向花
前打拍浮歐陽文忠句云空留此日田田葉不見當年
步步入又荷葉云池面風來波濺灩陂間露下葉田田
誰於水上張青蓋罩却紅妝唱採蓮梅聖俞重臺蓮云
彤雲赤霧生綠房朝霞變蕊珠粉光白玉入泥不滿盞
羽蓋衰露明月當濁水一石亂鼃鼃鑿池五丈如斗方
萍根科斗得自在荷芰明年出水央王半山鍾山西菴
白蓮亭云山亭新破一方苔白帝留花滿四隈野艷輕
明非傅粉秋光清淺不憑材鄉窮自作幽人伴歲晚誰

為靜女媒可笑遠公池上客却因松菊賦歸來邵子並
蒂蓮云漢室嬋娟雙姊妹天台縹緲兩神仙當時儘有
風流過摘向人間作瑞蓮東波橫湖云貪看翠蓋擁紅
妝不覺湖邊一夜霜卷却天機雲錦沒從教足練寫秋
光又和文與可洋州園池菡萏亭云日日移牀趁下風
清香不盡思何窮若為化作龜千歲巢向田田萬葉中
又詩云湖上棠陰手自栽問公更得幾回來水仙亦恐
公歸去故遣雙蓮一夜開詔書行捧縷金箋樂府應歌
相府蓮莫忘今年花發處西湖西畔北山前子由盆池
白蓮云白蓮生淤泥清濁不相干道人無室家心跡兩

蕭然我住西湖濱蒲蓮若雲屯幽居常閉戶時聽遊人
言色香世所共眼鼻我亦存鄰父閱我獨遺我數寸根
澗水不入園庭有三尺盆兒童汲甘井日宴泥水溫及
秋尚百日花葉隨風翻舉目得秀色引息收清芬此心
湛不起六塵空過門誰家白蓮花不受風霜殘徐仲車
白蓮云水一重重玉一重更無妖色媚西風雖然物外
能為素又恐人間只愛紅又芟荷歌云孔雀圍花翡翠
鈿青皇批畫買花錢滌魚飛膽大如拳琉璃瓦墜紫微
天湘妃曲譜誰可傳彩毫不動斜卷牋我家食客常三
千杯盤一樣青瑤圓麻姑下來尋水仙不見波瀾只見

烟昨夜秋風吹洞房起來先著碧霞裳半含笑面齊鬪
妝家家院落紺為牆不道採花人在傍貪看飛來白紵
郎亦有美人貞且良獨在碧綃幃下藏秦少游詩云方
塘收雨腳落日半遙岑芙蕖靜娟娟麗服撫翠衾無言
意自遠欲渡秋水深緬懷平生人對此詎可尋弄芳惜
晚晚酒至誰與斟天涯有歸雲聊寄相思心心閒獲清
賞芙蕖一何綺美人艷新妝歛袂照秋水端如蕩子妻
顧自良家子黃金選燕趙搖落對江沚薄暮風雨來獨
立淚加洗望君君詎知傾宮定誰似趙鼎臣詩云嬌紅
姪姪不勝姿只許行人半面窺恰似姑蘇明月夜水晶

宮殿貯西施范石湖詩云凌波仙子靜中芳也帶酣紅
學醉妝有意十分開曉露無情一晌斂斜陽泥根玉雪
元無染風葉青葱亦自香想得石湖花正好接天雲錦
畫船涼又荷池云方池留水勝埋盆露入蓮腮沁粉痕
鈴索無聲人不到小禽飛入鬧荷根又再賦郡治雙蓮
云館娃魂散碧雲沈化作雙蓮寄恨深千載不償連理
願一枝空有合歡心池光攔檻倚斜暉把酒看花醉不
歸但許鴛鴦相對浴休驚翡翠一雙飛兩歧秀罷已萬
萊春意還從菡萏回不是使君和氣勝此花應向別人
開又次韻袁起巖送郡沼雙蓮圖云珠淵玉水折方員

湧出雙蓮照酒邊壓倒小湖三級草增光後沼兩重蓮
茗華名字元相並桃葉根株本自連好把吳歛翻楚些
楊荷新曲勝當年放翁詩云風露青冥水面涼旋移野
艇受清香猶嫌翠蓋紅妝句何況人言似六郎南浦清
秋露冷時凋紅片片已堪悲若教巨眼高人看風折霜
枯似更竒又詩云天風無際路茫茫老作花王風露郎
只把千尊為月俸為嫌銅臭雜花香岳肅之珂新荷出
水云貼水初翻紫玉團忽驚矗立傍闌干瑤池七日來
青鳥玉鑑孤奩舞翠鸞曉露走盤珠顚瑩晚風颺蓋雪
衣寒從今十丈開花面太華峰頭更一看朱子詩云聞

道移根玉井傍開花十丈是尋常月明露冷無人見獨
為先生引興長誠齋盆池種蓮云飛空天鏡墮莓苔玉
井移蓮旋旋栽坐看一花隨手長挨開半葉出頭來稍
添菱荇相縈帶便有龜魚數往回剗欲繞池三兩匝數
聲排馬苦相催西府寒泉汲十尋深澆淺灑碧森森高
花已照紅妝鏡小蒼新抽紫玉簪鈿破尚餘新雨恨繖
踈纔作半池陰西湖瘦得如盆大更伴詩人恐不禁又
紅白蓮云紅白蓮花閃共塘兩般顏色一般香恰如漢
殿三千女半是濃妝半淡妝司花手法我能知說破當
知未大奇亂剪素羅裝一樹畧將數朶蘸胭脂又瓶中

紅白二蓮云紅白蓮花共玉瓶紅蓮韻絕白蓮清空齋
不是無秋暑暑被花銷斷不生揀得新開便折將忽然
到晚歛花房只愁花歛香還減來早重開別是香白蓮
半蒼未開時看作紅蓮更不疑到得欲開渾別了玉膚
洗退淡胭脂鄭安晚詩云一樣娉婷絕代無水宮魚貫
出瓊鋪緣何買得凌波女為有荷盤萬斛珠王暝芙蓉
云齒萼初舒艷竒芬暈碧霄中洲欣邂逅南浦自招搖
瑩色含香霧新袍坼絳綃娉婷自珍愛穠郁更清超照
水臨青鏡偎蘋倚彩翹駢枝疑貫寵竝萼似爭嬌綽約
霞初映披敷煙正銷鬚粧金粉嫩房闌玉冠喬月下仙

入竅風前公子袍清虛雲步濕沈浸瀟津饒濯濯靈修
質盈盈神女標孤貞無漫漫雅則絕纖妖喜動文鴛舞
光搖錦鯉跳瓊根託紺潔翠蓋障炎囂靚質聯瑶席芳
零集桂橈姚園多猥俗陶徑亦蕭條華井分流潤天池
引脉遙須移元圃種莫向若耶漂木末興幽詫濂溪結
冥招懷之思遠道秋入鬢蕭蕭林石田景熙荷珠云霞
衣蔥佩來珊珊水晶之宮綠玉盤誰與馮夷作戲劇貝
闕驅入神瓢翻又疑罷織鮫人泣碧窪融作水銀汁圓
或為璧方為珪寒光滉漾不可拾古來歌器戒覆傾真
宰之柄常惡盈季倫買笑輕百斛金谷轉首迷荆榛紛

紛魚目爭貴惜道眼獨懸諸幻息須臾海霽山日高綠
雲萬柄淨如拭又荷錢云盈盈新疊碧難借柳條穿鑄
景菰蒲外買鄰鷗露邊炎官初掌柄水國不書年漸長
薰風價折筩供酒船孔允南山詩云萱草軒窗處處幽
酒中不著客中愁芭蕉葉上無多雨分與池荷一半秋
江萬里朝宗詩云結亭臨水似舟中夜雨瀟瀟亂打篷
荷葉曉看元不溼却疑悞聽五更風虞可齋詩云晚來
一棹鑑湖東隊隊峰巒入短篷一色藕花三十里淡妝
濃抹錦雲紅王月浦詩云雨餘無事倚闌干媚水荷花
粉未乾十萬瓊珠天不惜綠盤擎出與人看白玉蟾繪

蓮云筆底荷花水面浮纖毫造化奪工夫為誰畫出生
綃上素華山頭玉井圖濃淡色中勻粉膩淺深痕上著
胭脂華堂展處南薰起一似西湖六月時金趙鈞石瀨
盆池荷花云一泓寒碧甃波光雨後妖紅獨自芳不許
纖塵汙秀質政須清吹發幽香洛神初試凌波襪妃子
來從畧石湯休笑埋盆等兒戲要令引夢水雲鄉又詩
云誰開玉鑑瀉天光占斷人間六月涼日落沙禽猶未
散也知受用藕花香段復之荷葉露云仗下華清賜浴
時溫泉香膩洗凝脂團花翠壁琉璃滑狼籍珠璣醉不
知元遺山題鷺鷥敗荷扇云荷經凍雨綠全枯葦到窮

秋影亦疎為問風標兩公子此中能有幾多魚元劉夢
吉秋蓮云瘦影亭亭不自容淡香杳杳欲誰通不堪翠
減紅銷際更在江清月冷中擬欲青房全晚節豈知白
露已秋風盛衰老眼依然在莫放扁舟酒易空又趙昌
荷花云我家東湖三百頃瑞錦縱橫綠雲凝森森曉氣
天香飛星斗光沉水花淨遠如嬰兒脫文褌近若胎仙
臨玉鏡瓊杯欲側雨絲垂金掌初調露珠定盡將機心
付鷗鷺小雨輕烟穿短艇京城烏帽二十年夢入滄洲
寄清興趙生畫意不畫格淺粉輕砂養真性韜精斂容
羞自陳三沐無言月華靚邇來馮於號能事老嫩風情

毫髮証元黃已辦神俊枯逐影之人道中病高堂視此
青琉璃香色俱忘保清淨薩天錫詩云斑簾十二捲輕
碧秋水芙蓉隔畫欄綵扇搖風霞透影錦袍弄月酒生
寒湘魂翠袖留江浦仙掌紅雲溼露盤只恐淮南霜信
早絳紗籠燭夜深看吳草廬雙頭白蓮云花中君子志
同方簪合蘄流百世芳允智雙清耻周粟皇英競巧繡
虞裳房蜂共蒂各生子囊麝連臍不斷香潔白二難相
伯仲難分誰苦又誰良花神亦有弟兄行幻出亭亭並
蒂芳二佛同敷獅子座三閻賸集大夫裳金莖單捧雙
盤露玉筍勻分兩臉香肥白陳平羞獨美齊名要共一

心良又敗荷云嬌紅久失六郎張黛綠殘妝更遇霜照
影有慚同敗卒返魂無計覓巫陽三生傾蓋成憔悴一
半披衣墮混茫畢竟明年青不改依然十里遠聞香又
題畫雙頭蓮圖云天光水鏡淨泓然燦爛心花發瑞蓮
認得一茄雙菡萏千枝萬蕊一根連花中君子濂溪獨
分作河南二鄂華天為有兒雙秀發送將此瑞到公家
又題太乙真人蓮葉圖云裸裸赤身無寸絲浮浮一葉
作兒嬉貪嗔應是全無了尚有人間半點庭龜巢蓮葉
曾千歲仙卧蓮舟今幾年融得幻身無一有凌風飛去
更超然陳遂初基白芙蓉云帝子西遊太液池一杯秋

露為君持空令越女羞容貌不與唐昌共本支姪姹最
憐無語處風流全在半開時自移長信宮中去學得斑
娘淡畫眉謝宗可藕花風云舞落紅衣起未休水雲鄉
裏正颼颼五更清逼銀塘露六月涼生玉井秋颼浪低
翻霞影亂凌波輕弄錦香浮莫教吹醒鴛鴦夢好送真
人一葉舟又荷錢云青蚨飛遶半池蓮化作波心萬點
圓白水真人應愛寶上清童子解留錢買空太液繁華
夢占斷西湖富貴天一把藕絲穿不起五銖衣冷碧波
烟胡申之天游詩云清池瑩人心俯見荷葉背南塘非
不佳無此青錢蓋沈沈古鏡淨濯濯明妝對涼風似留

人幽賞心獨會天公亦解事一雨不破塊小呼巫陽雲
浣此傾國態高盤捧跳珠錯落無小大恍疑逢二妃迎
笑爭解珮低昂巧簸弄明月聚還碎馮夷不容容轉眄
何所在人生總虛幻竚立增嘆慨聊將一餉間了我看
花債漁翁不我待誰復同此愛長嘯歸去來餘芳滿襟
帶吳溫甫師道蓮藕花葉圖云玉雪竅玲瓏紛披綠映
紅生生無限意只在苦心中李祁題畫蓮云分得西湖
一畝多紅妝凌亂倚清波初疑載酒穿花去露下月明
聞棹歌何臨川中詩云曲沼芙蓉映竹嘉綠紅相倚擁
雲霞生來不得東風力終作薰風第一花貢有初畫蓮

云吳王宮殿水流香步躑廊深暑氣涼長日香風吹不
斷藕花多處浴鴛鴦李孝光採蓮曲云采蓮復采蓮蓮
生隔江水不愁無舟楫但愁波浪起又夏日荷亭即事
云避暑何所適南亭俯中渚鷗鷺了不驚况復涼入髓
水華露未晞香氣紛旖旎美人美無度嬋娟照江水滌
滌玉雪姿何能畏裊暑南風從天來入我懷袖裏高氣
行青雲且置吾白羽邇來不飲酒煮藥咽香蕊羣賢政
自佳有作動盈紙但恐清興闕遭此催詩兩張伯雨碧
筒飲云採綠誰持作羽觴使君亭上晚尊涼玉莖沁露
心微苦翠蓋擎雲手亦香飲水龜藏蓮葉小吸川鯨恨

藕絲長頰壺誤展淋郎袖笑絕耶溪窈窕娘于白生石
西湖荷花云我昔扁舟泛湖去回望荷花浩無數誰家
畫舫倚紅妝笑聲迴入花深處笙歌淒咽水雲寒花色
似嫌脂粉汙夜深人靜月明中方識荷花有真趣水天
倒浸碧琉璃淨質芳姿澹相顧亭亭翠蓋擁羣仙輕風
微顫凌波步酒暈潮紅淺渥唇膚如凝脂腰束素一捻
香骨薄裁冰半破芳心嬌泣露湖光花氣滿衣襟月落
波寒浸香霧恍然人在蕊珠宮便欲移家臨水住回首
落日低黃塵十年不到湖山路花開花落幾秋風湖上
青山自如故明劉青田扇面荷花云玉井芙蓉紅粉顯

何人移向月中栽高軒忽漫看圖畫疑是昭陽曉鏡開
高季迪新荷云如蓋復如鈿初生雨後天葉低浮水上
莖弱裊風前乍覆遊魚戲難藏宿鷺眠佳人休便折留
蔭採蓮船瞿宗吉卷荷云初出波心葉半含乍舒還卷
密浮藍舞衣對東青鸞鏡封事齊藏綠玉函酒沁碧筒
連客飲龜巢翠繭倩誰採南風漸見吹成蓋又聽千聲
夜雨酣陳白沙茂叔愛蓮云不枝不蔓體本具外直中
通用乃神我即蓮花花即我如公方是愛蓮人高木叔
棟題紅白蓮云素艷穠華似鬪開露房雙啓暗香來只
疑月下瑤池會半出紅妝捧玉杯李東陽詩云十分芳

氣襲人清未羨蘭蕙更菊英盡去穠華還古淡絕無言
笑有風情根含瀛海波濤潤色藉天家雨露榮見說中
通能外直此心端合與花盟天與靈姿絕代清看渠直
作水中英雲端別有栽培地江上空多採掇情總是丹
青終屬幻未經題品若為榮他年自許歸來樂不結陶
翁社裏盟吳匏菴為周郎中公瑞題觀蓮圖云玉井蓮
開花十丈此事詩家徒自誑何處池頭有此花分明蜀
錦裁成障清陂渺渺波洋洋水榭人疑坐天上白羽風
輕頻自搖紅妝日出閑相向畫工作此待誰題意匠欲
追崔子西平生比德是君子耶溪不擬定瀟溪瀟溪舊

有愛蓮說意見豈與埤雅齊溪流一派接雙井雲孫早
躡青雲梯常明卿倫採蓮曲云棹發千花動風傳一水
香傍人持並蒂含笑打鴛鴦沈石田竝蒂蓮花云耶溪
新綠露嬌癡兩面紅妝倚一枝水月精魂同結願風花
情性合相思趙家阿妹春眠起楊氏諸姨晚浴時今日
六郎顛顚盡為渠還賦斷腸詩文衡山秋蓮云九月江
南花事休芙蓉宛轉在中洲美人笑隔盈盈水落日還
生渺渺愁露洗玉盤金殿冷風吹羅帶錦城秋相看未
用傷遲暮別有池塘一種幽陸平泉句云香濕瓊衣迷
曉霧塵銷羅襪起秋風宗子相臣詩云蓮花比妾貌妾

貌不如蓮花比妾心妾心應更苦邊華泉題採蓮圖
云秋塘露下菰蒲冷野鷺沙鳧夜相並東山月出一丈
高岸柳垂垂見踈影雞鳴浦口魚伴稀自採紅蓮溪上
歸徐存齋吏部院中觀蓮云曲徑方池別館東荷開殊
勝昔年紅虛瞻玉井青冥上似覩金蓮紫禁中佳實豫
知深雨露苦心原是耐霜風亭亭獨立烟波冷肯羨春
華在漢宮黃佐詩云水殿盈盈萬玉妃凌波長是步炎
暉迢遙玉井峰頭見縹緲瑤池月下歸洛浦露繁珠作
珮楚臺風急翠成幃若教解語應愁絕聞道金籠鎖雪
衣張虛菴詩云日氣沈山紫荷花照水明香含風細細

影浸月盈盈妃子華清浴神君洛浦行向人嬌欲語解
語恐傾城徐文長畫石榴荷花云畫得荷花朶傍依海
石榴西施夜浴罷催火照梳頭王辰玉衡大內蓮花云
西山青落影娥池仗外芙蓉入照時薄雨未銷初日暈
曉風欲語向人枝六宮香粉流紅膩三殿浮涼湛綠漪
的的夜舒人不見集靈臺畔露華知又張虛菴湖上賞
蓮云湖上峰稠亂晚晴每逢佳處問山名偶因寺好頻
停舫貪為波澄不記觥斜抱連環千嶂合平分雙鏡六
橋橫更堪歲宴芙蓉冷水國西風日夜清周鼎陶耕學
紅白荷花扇面云欲語還停隔扇羅主家池館晚涼多

紅顏自得南薰意皓齒偏能子夜歌
忽憶綵雲湖上見恍疑瓊珮月中過
淡妝濃抹多相似回首耶溪渺綠波
申瑤泉黃臺蓮云九疑山下分奇種
百子房中吐瑞姿朶朶黃雲團羽蓋
為迎金母下瑤池芙蓉為帶菊為裳
高結重臺散異香見說君王頻問寢
名花長映御袍黃孫淇澳慎行詩云
一天霞采正流虹出水芙蓉欲吐紅
縱是連宵困寒雨終然危幹獨凌風
乾坤尚鬱胚胎裏身世都忘水玉中
慎爾芳馨良自愛晴光早晚總天功
馮琢菴秋蓮云坐對芙蓉沼行歌棠棣
吟相依香漠漠獨立影沈沈人自憐
芳艷誰當識苦心秋風漸蕭索結

子已如今馬芭生德澧詩云朶朶紅蓮映綠池微風吹
動影參差深閨寂寞嫌長晝一點芳心只自知鄭光泰
德明詩云曲曲闌干水殿涼紅綃扇底芰荷香按歌誤
觸鴛鴦起宮漏今宵分外長桃花女子集云西湖荷葉
綠盈盈露重風多蕩漾輕倒折荷枝絲不斷露珠易散
似郎情近時施愚山采蓮曲云不惜羅裙溼花沾竟體
香好留荷葉在為覆兩鴛鴦結子憐花少回船出葉遲
水清時見影偷眼照蛾眉汪茗文采蓮曲云月色涵清
露荷花映白蘋一雙花下鳥妬殺蕩舟人采蓮若耶溪
溪流清更深但解照儂影不解照儂心趙疑叔畫荷云

雙鷺飛來攪水渾，遠陂荷葉大於盆。再添茅屋臨修竹，
便是江南雨後村。唐濟武夢賚詩云：箬帽單衫八月天，
竹兒水國意蕭然。嘗憐洞壑無賓主，久約烟霞共往還。
黃稻風來花外寺，青山雨歇樹邊泉。劍池孝水明湖館，
百脉名當第幾傳。王漁洋白蓮花云：無復澄江載酒船，
折枝猶帶五湖烟。香來月白風清裏，花放叢祠水驛前。
鴨接池萍微雨後，犀垂簾押夕陽天。魯連陂上新秋色，
觸忤閑愁又一年。又詩云：陂名傳僕射，秋氣滿蕪葭。十
里銀塘冷千枝，白蠟斜他年履道宅。應憶管城花素手，
誰攀折飄零似水涯。又白蓮云：夕陽樓下鴈團沙，菡萏

風香一水涯今日魯陂千頃雪不須更憶管城花又云
銀塘兩岼夜明苔新月光中玉管催雪苧翻翻鶴翎散
凌波真見洛川來又瓶中荷花云載酒紅橋日扁舟蓮
葉東蕭蕭沙鳥白漠漠渚花紅明鏡生瀟照清流澹惠
風別來一千日相見膽瓶中魯連陂上路十里白蓮花
遙夜孤舟泊無人山月斜斷橋三汊水籬落幾人家津
市垂楊岼何人繫釣查陳其年新荷云山光寺外過官
柳尚垂絲及到如臯日新荷已滿池錢輕爭自貼蓋小
正堪持莫待三秋後空房使妾悲史胄司夔采蓮曲云
撥棹裏河去連隄種芰荷折來與郎嗅香比外湖多張

浣心冷殘荷云水冷風淒氣已涼荷衣秋老不聞香采
蓮人散歌聲寂明月還來照野塘王季友鴻緒采蓮歌
云采采江水濱荷花照臉新莫愁西日晚明月解留人
徐方虎倬采蓮曲云溪女盈盈朝浣沙單衫玉腕蕩舟
斜含情含怨折荷花折荷花遺所思望不來吹參差吳
天章雯詩云鎮州荷花一萬柄正對城門是酒家下馬
當壚更斟酌醉臨明鏡看吳娃宋大塗倣秋荷云露冷
蓮陂半已空芳叢零落泣西風無人解道殘花好獨立
寒塘煙雨中家初白詩云一片頗黎上下空芙蓉城現
水晶宮已離大地炎埃外尚在諸天色相中未免情多

絲宛轉為誰心苦竅玲瓏雲烘日炙如相試賴是清涼
不待風雕闌北面小亭旁久坐真成透骨香翠羽拂簾
開皎鏡綠衣扶扇侍紅妝繁華肯鬪春三月澹蕩偏宜
水一方馬跡車輪尋不到別依淨域作花王菰蒲響雨
午瀟瀟洗盡胭脂取寂寥一鷺偶依踈影立雙魚忽破
靜機跳輕橈劃浪紅翻岸高柳移陰碧過橋宛在中央
情脈脈微波咫尺去人遙菱角雞頭漸滿池亭亭獨攬
出塵姿難留雨露珠頻寫自拔汙泥性不淄老衲山中
移漏處佳人世外改妝時白頭相對歸心切欲捲江湖
入小詩趙秋谷君子洲云為愛金沙出郭看一洲水段

葉聲乾不須苦憶花時節君子由來有歲寒邵柯亭瓊
詩云曾從楚客賦蘭茝喜見風翻赤羽幢欲采名花遺
良友還憑遠夢落秋江盤承雨露珠無算莖並鴛鴦蒂
自雙此日仙城誰作主凝眸遙望凭紅窗儲六雅大文
秋江詞云瑤草媚瓊樹杪海客居何縹緲泛長江楚天
曉木蘭舟外烟波繞江上景山嵯峨仙人樓迴輕雲過
美人簾卷秋色多鴛鴦隄裏忽驚散西風遙送采蓮歌
采蓮歌怨遲暮芙蓉花墜江露高章之題畫蓮云畫蓮
真是愛蓮身點筆無多剩有神三十六陂秋最好江南
愁絕白頭人又荷珠云幾許驪珠媚碧川盈盈捧出木

亭前青蘋風際千迴轉紅藕香中萬顆圓貫處未容披
柳線買時應不費榆錢光華照夜仍相借一點清輝月
在天盧夢山道悅盆蓮初放云深沈院宇無人到摩腹
中庭獨往來語落枝頭雙鳥立香浮水面一花開況中
不染誠高節盆內能容屬異才八十老翁初髻女空齋
晤對兩遲回畢澗堂海琬詩云竹爐聲沸縷煙斜新到
江南穀雨茶一徑濃陰飛細雨滿池初放白蓮花沈方
舟用濟詩云風江潮動月茫茫懊藹聲中夜未央南北
東西盡蓮葉不知魚戲在何方尤昭嗣芙蓉映水曲云
秋江歛盡開明鏡湘女窺簾曉妝靚遺佩飄香散作花

一枝艷質臨江映江水盈盈未易求相思空望夕陽樓
西風一夜生南浦零落紅衣入暮愁朱恭季弈恂荷珠
云小雨林塘淨碧羅田田分得夜光多江妹唾逐天風
落仙掌晴分曙月過幸未贈來愁結佩若為采去誤凌
波蕩舟耶女休相妬樂府虛裁一斛歌盛庭堅錦白蓮
云玉井分栽到野塘冰綃翠袖迴生涼半江殘月欲無
影一岍冷雲何處香真相尚留開士傳紅衣盡洗美人
妝水仙操罷扁舟去誰與凌波解佩璫錢修亭詩云蘭
若名仍古修靈靜者便繁花依徑曲老樹得秋先地僻
偏留客心空不得禪如何落日意故故促歸船周七峰

白蓮云仙蕖濯濯原無染素鞮凌波更絕塵澹影自臨
秋水照高情只許野鷗親常留本色還君子何必濃妝
及美人我亦近來消綺思風清月白好為隣又荷錢云
豈借洪鑪巧鑄成天然浮水半銖輕泉香益覺銅為臭
品潔無妨溪可盈對此不言翻近俗愛他成癖却真清
野塘已足千餘片攘攘何煩與世爭飲馬長川久不投
青錢誰布滿芳洲林塘憑藉增高價鳧雁支持度早秋
偏是富兒難與說縱無福命也堪求烟波深處人爭少
正好收來拄杖頭古綠團團貼水鋪藕心舊製較何殊
規成月似十分好磨得銅腥半點無文士臨池誇萬選

賈兒利洪羨三銖阿兄風味全然別寄語貪人莫浪呼
朱曉村續志詩云鄴溪之水噴長虹倒流屈曲層巖中
白如雲白紅霞紅溪面搖曳千芙蓉羣仙競下蓬萊宮
亂拖雲錦凌天風跋刺魚戲蓮之東縠紋波皺青如蔥
燕尾剪破秧針縫沿溪指點問春農穠秬歲歲占屢豐
家家釀酒琥珀濃酌我底須罍與鍾請從溪上折蓮筒
王海重藕花居云名藍俯河曲愛此青瑤流芰荷一萬
柄下見龜魚游禪心不污染得似青蓮不抗塵浦詩云
吹香掩冉入輕撓柳下清風艷思饒望去不知花有數
坐來惟覺暑全消唼波魚勝迷前浦曬翅鷗羣隔畫橋

翠蓋愛看擎萬柄晚涼添雨更飄蕭又題畫荷云佛有
廣長舌試與叅蓮宗為是紅菡萏為是青芙蓉王東田
盆荷云折得青荷柄插盆聊自娛西風雲錦段吹夢落
江湖崔曼亭蓮渚詞云若耶溪上棹舟女權入蓮花傍
蓮渚田田凝露墜驪珠灼灼翻風棲翠羽憶昔見歡時
渚畔鴛鴦舞感此重徘徊目成各心許歡情蓮渚深妾
意蓮子苦但言止水無波瀾不信秋風到眉嫵風迴菱
刺罨羅衣露下縈燕採擷稀更倚蘭橈望南浦紅芳零
亂白鷗飛陳寶所荷錢云翠葉浮新夏圓於萬選錢藕
心寧共碎鵝眼漫教穿買笑青娥許觀文白水連銅耀

終不染清淨托根偏又盆荷云空庭小立妙香聞不共
閒鷗野鷺分想見臨平山下路綠波千頃蓋紅雲金醉
墨荷鼻云蓮腮荷背垂芳久鼻觀清虛更散芬不潔怕
入蒙處掩惟香容我靜中聞炎涼雨過塵氛辨清濁風
來臭味分氣息直通花葉裏任他歟噀鬱紛紛又荷葉
云纔抽新蓋弄微和波面依稀縐薄羅風急翻時憐影
側兩頻飄處覺聲多莖莖可是貽仙子扇扇真疑掌翠
蛾最喜畫欄閒看處鴛鴦來覓舊巢窠金子青殘荷云
圓鏡昏青銅天空露珠濕鴛鴦背人去蜻蜓避風立回
頭空所懽蕩舟差見妾顧樊桐白蓮云誰携仙葯下三

湘羅轆無塵鏡有香柳外烟中風致澹銀牀冰井夢魂
涼歌成相府人如玉采到江南月似霜學士滿宮顏色
在幾人堪許叩西皇閨秀錢冠之荷蓋云寒裳曾一笑
出水見田田落月涵清影遙峰淡暮烟淺分螺黛色青
偈蔚藍天誰與遺珠珮湘流記昔年王雪芝風荷詩云
轉蕙披蘭引夕芳又扶菡萏溢金塘湖波渚露滴清響
葉嶼花潭聞暗香斜飈錦屏搖翡翠舞迴紅袖蓋鴛鴦
畫橈日暮相容與消受輕風倚檻涼唐杜少陵蓮房句
云露冷蓮房墜粉紅宋司馬溫公蓮房云蓮房前後熟
供噉不須齊肉嫩山蜂子稜深天馬蹄尚憐餘蕊在深

映綠荷低脆美如新採近根猶帶泥僧雲隱蓮房句云
刺分玉蛹堆盤脆嚼破冰丸繞齒涼無名氏蓮實云城
中擔上賣蓮房未抵西湖泛野航旋折荷花剝蓮子露
為風味月為香綠玉蜂房白玉蟬折來帶露復含煙玻
瓊盆面冰漿底醉嚼新蓮一百圓蜂不禁人採蜜忙荷
花蕊裏作蜂房不知玉蛹甘於蜜又被詩人嚼作霜山
蜂愁兩損蜂兒葉底安巢更倒垂只有荷蜂不愁兩蠟
房仰卧萬花被蜂兒來自宛溪中兩翅雖無已是蟲不
是荷花窠裏蜜方成玉蛹未成蜂金張虛舟檝蓮實云
水妃擎出紺珠囊玉笋雕槃喜乍嘗膚白已攬新藕嫩

心清猶帶小荷香鬪餘翠鳥零珍羽飛盡黃蜂露蜜房
口腹累人良可笑此身便欲老江鄉元宋子虛囉嘖曲
云玉井荷花碧中藏偶意深綠房千萬萼多少可憐心
明高季廸蓮房聯句云剖心效諫忠並頭呈瑞兆裊
蹄密竅剗魚目微光皎珠珥落盤多瑤軫貯囊小空實
外莫辨甘苦中自了徐幼文折蓮子云落盡紅衣見綠
房折來猶帶水雲香柔絲零落芳心苦未及秋風已斷
腸黃陶菴詩云東湖西湖蓮萼開一日搖船采一回蓮
葉田田無限好只因曾見美人來孟淑卿題美人觀蓮
圖云綠沁蟬靜日偏長嬾藝金鑪百和香莫摘池中蓮

子看个十多半是空房近時杭廛浦蓮子云蓮子吾憐
子空房可惹嫌寸心長自苦清味豈能厭綠待羅襦解
圓看玉果拈當筵荷氣透索向翠盤添陳寶所蓮蓬云
蓮實蓬池種采香曾入吟美人愁目極涼月照房深一
碧酒連破十雙花外尋老夫心正苦於汝更憐今金醉
墨蓮蓬云初疑笑罷握拳長却異花枝號米囊映水摘
嘗同芡實朝天倒影挂蜂房猶思嬌面臨池鏡也愛金
莖矗野塘湖目芳從游百度推蓮送盞好鈎藏唐韓昌
黎古意云太華峰頭玉井蓮開花十丈藕如船冷比雪
霜甘比蜜一片入口沈疴痊我欲求之不憚遠青壁無

路難賣緣安得長梯上摘實下種七澤根株連宋藕子
由蹋藕云春湖柳色黃宿藕凍猶僵翻沼龍蛇動撐船
牙角長清泉浴泥滓粲齒碎冰霜莫使新朽盡炎風翠
蓋涼胡蕭灘致隆山谷坐上分題賦藕云平生冰雪姿
七星羅心胸豈無有絲毫上裨天子聰而不自薦達胡
為乎泥中沈疴正無賴安得君從容其子亦可憐風味
如乃翁陶商翁藕云萬頃金沙裏誰將玉節裁絲應鮫
乞與珠是蚌分來盤貯冰猶結刀侵雪易摧防風骨外
折混沌竅中開月寺僧家鉢風亭酒客杯胸中秋氣入
牙角兩聲回自媿塵泥賤得蒙樽俎陪與君消酷暑瓜

李莫相清揚誠齋藕云比雪猶緊在無絲可得飄輕拈
愁欲碎未嚼已先消劉後村藕句云如拈玉塵涼雙手
似瀉金莖嚙上池元周昉望震冰盤雪藕云清澈冰
盤壓蔗漿酒酣雪藕近華堂凝寒色映瑤華脆真白絲
連翠袖香金掌曾聞承玉露瓊臺忽見擣元霜文園近
日真消渴莫種蓮根引恨長謝宗可藕絲云絆玉纏香
吐未齊蓮房縵出蛹初肥纖毫何補寸心苦幾縷空縈
七竅飛園客可能抽翠繭靈均難為製荷衣年年五月
無人買欲織鮫綃不上機明瞿宗吉紅藕云竅斷朱絲
面發紅波心一笑逞妖容提攜纔出污泥內點染重歸

色界中酒暈冰腮含醞藉霞蒸玉骨照玲瓏六郎傳得
還丹術更約相尋太華峰李西涯賜藕云祇向名花看
畫圖忽驚仙骨在泥塗輕同握雪愁先碎紅比餐冰聽
却無郭壯芳菲懷故里江南風味憶西湖渴塵此夜消
應盡未羨金莖與玉壺于健齋慎行紀賜鮮藕云芙蓉
別殿曉風涼玉井靈根出水香薦熟方聞開寢廟賜鮮
已見布朝堂冰絲欲斷鮫人縷瓊液疑含閨苑霜憶昨
金鰲橋上望紅衣翠蓋滿銀塘近時王西樵藕粉云仙
粉珍雲女何如此物竒色深連珀椀滑劇溜犀匙功是
神農曉之堪野客知故園陂澤接應足慰吾私金醉墨

藕腸云英藕柔腸絕點埃臨風搜索幾紆迴長牽首為
冰房斷多引難教玉節灰淨處冷能成別趣空中剖可
見清裁休言綃縷抽扃細十文如椽是本胎宋宋景文
蝶戀花詞云雨過蒲桃新漲綠蒼玉盃傾墮碎珠千斛
姬媼擁前紅簇簇溫泉初試真妃浴驛使南來丹荔熟
故翦輕綃一色頒時服嬌汗易晞凝醉玉清涼不用香
綿撲晏叔元蝶戀花詞云妖艷秋蓮生別浦紅臉青腰
舊識凌波女照影弄妝嬌欲語西風豈是繁華主可恨
良辰天不與纔過斜陽又值黃昏雨朝落暮開空自許
竟無人解知心苦又蓮實漁家傲云粉筆丹青描未得

金鍼綵線功難敵誰傍暗叢輕採摘風淅淅船頭觸散
雙鷗鷺夜雨染成天水質朝陽烘出胭脂色又落又開
人共惜秋風逼盤中已見新蓮葯歐陽文忠蝶戀花詞
云一曲天香金粉膩蓮子心中自有深深意蕙密蓮深
秋正媚將花寄恨無人會橋上少年橋下水小棹歸時
不許牽紅袂浪濺荷心圓又碎無端欲墮相思淚又云
水浸秋天風皺浪縹緲仙舟只似秋江上和露採蓮愁
一餉看花却是啼粧樣折得蓮莖絲未放蓮斷絲牽特
地成惆悵歸棹莫愁花蕩漾江頭有箇人相望又云越
女採蓮秋水畔窄袖輕羅暗露雙金釧照影摘花花似

面芳心六共絲爭亂鷓鴣灘頭風浪晚霧重煙昏不見
來時伴隱隱歌聲歸棹遠離愁引著江南岸又漁家傲
云荷葉田田青照水孤舟挽在花陰底昨夜蕭疎微雨
墜愁不寐朝來又覺西風起雨擺風搖金蕊碎合歡枝
上香房翠蓮子與人長廝類無好意年年苦在中心裏
又云為愛蓮房都一柄雙苞雙蕊雙紅影兩勢不來風
色定池水靜仙郎綵女臨鸞鏡妾有容華君不省花今
恩愛猶相並花却有情人薄倖心耿耿因花又染相思
病又云葉有清風花有露葉籠花罩鴛鴦侶白錦頂絲
紅錦羽蓮女妬驚飛不許長相聚日腳沈紅天色暮青

涼傘上微微雨。早是水寒無宿處。須回步。枉教雨裏分
飛去。又云妾本錢塘蘓小妹。芙蓉花共門相對。昨日為
逢青傘蓋。慵不採。今朝斗覺凋零煞。愁倚畫樓無計奈。
亂紅飄過秋塘外。料得明年秋色在。香可愛。其如鏡裏
花顏改。又云花底忽聞敲兩槳。逡巡女伴來尋訪。酒盞
旋將荷葉當。蓮舟蕩。時時盞裏生紅浪。花氣酒香清麝
釀。花腮酒面紅相向。醉倚綠陰眠一餉。驚起望船頭閣
在沙灘上。又云葉重如將青玉亞。花輕疑是紅綃挂。顏
色清新香脫灑。堪長價。牡丹怎得稱王者。兩筆露箋勻
彩畫。日。熅風炭熏蘭麝。天與多情絲一把。誰廝惹。千條

萬縷縈心下又云幽鷺漫來窺品格雙魚豈解傳消息
綠柄嫩香頻採摘心似織條條不斷如牽役珠淚暗和
清露滴羅衣染盡秋江色對面不言情脉脉煙水隔無
人說似長相憶又云楚國細腰元自瘦文君臙臉誰描
就日夜鼓聲催箭漏昏復晝紅顏豈得長如舊醉折嫩
房紅蕊嗅天絲不斷清香透却傍小闌凝望久風滿袖
西池月上人歸後東坡浣溪沙詞云四面垂楊十里荷
問云何處最花多畫樓南畔夕陽和天氣乍涼人寂寞
光陰須得酒消磨且來花裏聽笙歌晷無咎新荷葉詞
云雨過回塘圓荷嫩綠新抽越女輕盈畫橈穩送蘭舟

波光艷粉紅相間脈脈嬌羞菱歌隱隱漸遙依約凝眸
堤上郎心波間妝影遲留不覺歸時暮天碧月如鉤風
蟬噪晚餘霞映幾點沙鷗漁歌不到有人獨倚危樓劉
德脩光祖洞仙歌云晚風收暑小池塘荷淨獨倚胡牀
酒初醒起徘徊時有香氣吹來雲藻亂葉底游魚動影
空擎承露蓋不見冰容惆悵明妝曉鸞鏡後夜月涼時
月淡花低幽夢覺欲憑誰省且應記臨流凭闌干便遙
想江南紅酣千頃陳簡齋菩薩蠻詞云南軒面對芙蓉
浦宜風宜月還宜雨紅少綠多時簾前光景竒絕牀烏
木几盡日繁香裏睡起一篇新與花為主人蘇養直庠

臨江仙詞云獵獵風蒲初暑過蕭然庭戶秋清野航渡
口帶煙橫晚山千萬疊別鶴兩三聲秋水芙蓉聊盪槩
一樽同破愁城蓼花灘上白鷗明暮雲連極浦急雨暗
長汀劉辰翁沁園春詞云淺碧芙蓉素艷亭亭前身阿
嬌記湘浦露冷酥容倍潔華清水滑酒暈全消瑤翦豐
肌雪翻碎萼白羽鮮明時自搖風流處是古香幽韻時
度鮮飈瓊枝璧月清標對千朵嬋娟傾翠瓢况水晶臺
榭低迷淨淥冰霜詞調隱約輕橈細認金房種竒朵秀
已覺青衿橫素腰西風晚看花開十丈玉井非遙趙德
莊鵲橋仙詞云藕花亭上無塵無暑灑灑一池秋淨綠

羅寶蓋碧瓊竿翠浪裏重重月影一家姊妹兩般裝束
濃淡施朱傅粉夜深風入覺微寒問誰在牙牀酒醒康
伯可與之洞仙歌云若耶溪路別岸花無數欲斂嬌紅
向人語與綠荷相倚恨回首西風波淼淼三十六陂煙
雨新妝明照水汀渚生香不嫁東風被誰誤遣踟躕騷
客意千里綿綿仙浪遠何處凌波微步想南浦潮生畫
橈歸正月曉風清斷腸凝竚趙虛齋憶舊遊詞云望紅
蕖影裏冉冉斜陽十里沙平喚起江湖夢向沙鷗住處
細說前盟水鄉六月無暑寒玉散青冰笑老去心情也
將醉眼缺為花青亭亭步明鏡似月浸華清人在秋庭

照夜銀河落想粉香濕露恩澤初承十洲縹緲何許風
引綵舟行尚憶得西施餘情裊裊烟水汀高竹屋祝英
臺近詞云擁紅粧翻翠蓋花影暗南浦波面澄霞蘭艇
採香去有人水濺湘裾相招晚醉正月上涼生風露兩
凝佇別後歌斷雲間嬌姿黯無語魂夢西風端的此心
苦遙想芳臉輕顰凌波微步鎮輸與沙邊鷗鷺姜白石
夔惜紅衣詞云枕簟邀涼琴書換日睡餘無力細灑冰
泉并刀破甘碧墻頭換酒誰問訊城南詩客岑寂高樹
晚蟬說西風消息虹梁水陌魚浪吹香紅衣半狼籍維
舟試望故國渺天北可惜渚邊沙外不共美人遊歷問

甚時同賦三十六陂秋色王聖與水龍吟詞云淡妝不
掃蛾眉為誰竚立羞明鏡真妃解語西施淨洗娉婷顧
影薄露初勻纖塵不染移根玉井想颺然一葉颺颺短
髮中流卧浮烟艇可惜瑤臺路迴抱淒涼月中難認相
逢還是冰壺浴罷牙牀酒醒步韞空留舞裳微褪粉殘
香冷望海山依約時時夢想素波千頃張叔夏水龍吟
云仙人掌上芙蓉娟娟猶滴金盤露輕妝照水纖裳玉
立飄搖似舞幾度消寒滿湖烟月一汀鷗鷺記小舟夜
悄波明香遠渾不見花開處應是浣紗人妬褪紅衣被
誰輕誤閒情雅澹冶姿清潤憑嬌待語隔浦相逢偶然

傾蓋似待心素怕湘臯珮解綠雲十里卷西風去李建
中居仁水龍吟云蕊仙羣擁宸遊素肌似怯波心冷霜
裳縞夜冰壺凝露紅塵洗盡弄玉輕盈飛瓊綽約淡妝
臨鏡更多情一片碧雲不捲籠嬌面回清影菱唱數聲
乍聽載名娃藕絲縈艇雪鷗沙鷺夜來同夢曉風吹醒
酒暈全消粉痕微漬色明香瑩問此花曷貯瑤池應未
許繁紅並趙月洲汝鈞水龍吟云露華洗盡凡妝玉妃
來侍瑤池宴風裳水佩冰肌雪艷清涼不汗解語情多
凌波步穩酒容消散想溫泉浴罷天然真態渾疑是宮
妝淺暗想淒愁別岼粉痕消香腮凝腕雪空水冷此情

誰許鷺知鷗見羽扇微搖翠帷低擁清涼庭院待夜深
月上闌干更邀取姮娥伴周公謹綠蓋舞風輕詞云玉
立照新妝翠蓋亭亭凌波步秋漪真色生香明璫搖淡
月舞袖斜倚耿耿芳心柰千縷晴絲縈繫恨開遲不嫁
東風顰怨嬌蕊花底漫卜幽期素手採珠房粉艷初洗
雨濕鉛腮碧雲深暗聚軟綃清淚訪藕尋蓮楚江遠相
思誰寄棹歌回衣露滿身花氣又水龍吟云素鸞飛下
青冥舞衣半惹涼雲碎藍田種玉綠房迎曉一奩秋意
擎露盤深憶君涼夜暗傾鉛水想鴛鴦正結梨雲好夢
西風冷還驚起應是飛瓊仙會倚涼颺碧簪斜墜輕妝

鬪白明璫照影紅衣羞避霽月三更粉香千點靜聞十
里聽湘絃奏徹冰綃偷剪聚相思淚練行之怨可水龍
吟云素姬初宴瑤池珮環誤落雲深處分香華井洗妝
湘渚天姿淡泞碧蓋吹涼玉冠迎曉盈盈笑語記當時
乍識江明夜淨只愁被嬋娟誤幾點沙邊飛鷺舊盟寒
遠迷烟雨相思未盡織羅曳水清鉛泣露玉鏡臺空銀
瓶綆絕斷魂何許待今宵試採中流一葉共凌波去王
天柱易簡水龍吟云翠裳微護冰肌夜深暗濕瑤臺露
芳容淡泞風神蕭散凌波晚步西子殘妝環兒初起未
須勾注看明璫素鞵相逢憔悴當應被薰風誤十里雲

愁雪妬抱淒涼，盱嬌無語。當時姊妹，朱顏褪酒，紅衣按舞。別浦重尋舊盟，惟有一行鷗鷺。伴玉顏、月曉盈盈，冷艷洗入人間暑。唐菊山鈿水龍吟云：淡妝人更嬋娟，晚奩淨洗鉛華膩。泠泠月色，蕭蕭風度，嬌紅欲避。太液池空，霓裳舞倦，不堪重記。歎冰魂猶在，翠輿難駐。玉簪為誰輕墜。別有凌空一葉，泛清寒、素波千里。珠房淚濕，明璫恨遠，舊遊夢裏。羽扇生秋，瓊樓不夜，尚遺仙意。柰香雲易散，綃衣半脫，露涼如水。無名氏綠意詞云：碧圓自潔，向淺洲遠浦，亭亭清絕。猶有遺簪不展，秋心能卷幾多。炎熱鴛鴦密語，同傾蓋，且莫與浣紗人說。怨歌忽斷，花

風碎却平雲千疊回首當年漢舞怕飛去漫縐留仙裙
褶戀戀青衫猶染枯香還笑鬢絲飄雪盤心清露如鉛
水又一夜西風聽折喜淨看匹練秋光倒瀉半湖明月
金趙君獻可驀山溪詞云雲房西下天共滄波遠走馬
記狂遊正芙蓉平鋪鏡面浮空欄檻招我倒芳尊看花
醉把花歸扶路清香滿水楓舊曲應逐歌塵散時節又
新涼料開徧橫湖清淺冰姿好在莫道總無情殘月下
曉風前有恨何人見王茂孫蓮實點絳唇云折斷煙痕
翠蓬初離鴛鴦浦玉纖相妬翻被專房悞乍脫青衣猶
著輕羅護多情處芳心一縷都為相思苦元張仲舉摸

魚兒詞云問西湖舊家兒女香魂還又連理多情欲賦
雙蕖怨閑却滿奩秋意嬌旖旎愛照影紅妝一樣新梳
洗王孫正擬喚翠袖輕歌玉箏低按涼夜為花醉鴛鴦
浦淒斷凌波夢裏空憐心苦絲脆吳娃小艇應偷採一
道綠萍猶碎君試記還怕是西風吹作行雲起闌干漫
倚待載酒重來尋芳已晚餘恨渺煙水張伯雨摸魚兒
詞云問凌波並頭私語夜涼誰共料理柔情早被鴛鴦
妬怕擊水晶如意香旖旎待微雨清塵略為新妝洗騷
辭漫擬搴木末芙蓉同心輕絕未說已先醉空折損又
墮偷香夢裏藕絲不斷新晚吳娃小艇無踪跡也怪半

池萍碎。暎畧記是月冷。鷗眠鷺宿。曾驚起高荷。恨倚總
回首。西風露盤傾瀉。清淚似鉛水。近時湯潛。奔斌千葉
蓮。滿江紅。云藕葉鋪池。連陰雨。溪流青漲。東里叟扶邛
還問。後渠無恙。隨地菰蒲。雙鷺宿。垂楊半掩。波紋上碧
煙。開映曉。弄新妝。輕盈狀。廬山社。幽情漾。湓浦岾。清風
宕似。層層紅艷。美人堪餉。月下時聞。芳露滴。呼兒學作
漁郎唱。夢醒來。十里野塘中。遙相望。陳其年念奴嬌云
後湖長蕩。見烟鬟霧鬢。紅粧無數。葉暗荷深。三萬頃一
片嫩涼。成雨映水逾鮮。倚風欲笑。月又明。南浦隔江。試
采有人一樣。心苦。曾在。大士臺前。文人舌本。幻出花如

許一自汚泥淪謫久悵望瑤池懸圃漢苑飄香吳宮墮
粉幾遍閒簫鼓何時華頂與君攜手歸去又白蓮水龍
吟云水明樓下相看涼荷一色瓏鬆地赤欄低壓綠裳
輕蘸月明千里小苑梨花重門柳絮算來相似傍前汀
白鷺幾番飛下尋不見迷花底無數弄珠人戲小酥娘
水天間倚明粧束素非關只愛把穠華洗為怕秋來滿
湖紅粉惹人憔悴拚年年玉貌江潭夜悄凝如鉛淚又
荷錢八寶粧詞云欲綻紅衣將擎翠蓋先放錢錢葉大
已自成盤休訴窄百琲還能盛裹水邊樓上誰家嬌困
慵騰五銖閒向欄干簸不料幽潭深處偶然輕墮幸值

緩步江妃將綃攬取青蚨猶未曾破又怕被土花偷浣
傍綠水鋪來停妥笑芙蓉樣苔般誰做祇如鶯眼些兒箇
只未解遮藏彩鴛莫便一雙卧又荷珠滿路花詞云紅
綃水面妝碧玉波間柄低迷扶翠蓋西風勁玉人搖櫓
隔浦蓮歌競花面交相映戲取春纖掬他潭水芳冷灑
來錯落盡向錢錢迸鮫珠圓又碎難持贈低鬟凝想總
似檀郎性蕩漾何時定惆悵回船碧天早挂明鏡吳穀
人白蓮水龍吟云水香何處尋來一痕淡月微茫墜亭
亭瘦影珠衣暗曳鉛華淨洗小立烟迷相思露濕淞湖
涼意漸寒芳人到菱歌唱罷渾不信明璫倚掩映銀塘

十里倩西風綠羅扶起秋添水外惱人輕誤看花如水
素藕忍儂苦心憐子聚成清淚任雪鷗選夢夢回何在
在行雲裏只荷錢滿江紅詞云喚汝錢錢經多少波掀
浪碎纔選出勺圓萬箇藕心堪賽背面縱橫紅字篆中
央滉漾青銅海但估量付與摸魚兒陂塘買團圓鑄斜
陽內零星簸東風外更年年勾引許多吟債花有定評
君子貴地無私賞廉泉大待明朝一滴也甜時珠擊蓋
吳梅村蓮蓬人云獨立平生重此翁反裘雙袖倚東風
殘身顛倒憑誰戲亂服麤踈耻便工共結苦心諸子散
早拈香粉美人空莫嫌到老絲難斷總在污泥不染中

張亦巢運蓬人云手劈房空未棄捐人形製就態翩然
精魂豈轉三生石胎孕真從九品蓮紺色衣疑裁縠縷
清香身似染爐烟長語曳地腰肢束有恨無情自可憐
金醉墨蓮蓬人云閒把蓮房結束新宛然體態認清真
於中無有徒皮相巧飾鬚眉作貴人老去六郎空想像
摹來君子悵形神他時只怕乾枯盡那得臨窗送笑嚔
吳穀人蓮蓬人云蛻形丁倒倚西風剩有情絲幾縷通
吟到綠衣黃裏怨粧成粗服亂頭工苦心何在空憐子
反袂無端似惱公惆悵水亭曾識處夕陽單舸鬧涼紅
釋奚林成搏太乙仙人蓮葉舟云曾將一葉舟日夕狎

飛浪爛醉不歸來舟泊蘆花上尤悔菴蓮蓬入西江月
云妾比芙蓉解語郎如碧藕多思個人憔悴倒懸時知
道無心憐子空洞此中無物崛強猶昔孤支亂頭粗服
貌如斯未必六郎相似

附錄

西番蓮淡雅如菊之月下西施自春至秋相繼不絕亦
花中佳品藤本余按即今俗呼子午蓮也近時陳元孝
詩云西方佛有青蓮眼西番花有青蓮產朱絲作蔓碧
玉英繚繞踈籬意何限世間只尚紫與黃此花無色能
久長百花香者爭高價此花不售自開謝惟有幽人最
愜懷竟日盤桓倚僧舍

附錄 鐵線蓮花葉皆似西番花心黑如鐵線

附錄 山蓮草本花如蓮出百丈山又有旱藕出終南山服之

延壽

附錄 朝日蓮花色或黃或白葉浮水上翠厚而澤形似菱花
差大開則隨日所在日入輒斂而自藏於葉下若葵藿
傾陽之比宋景文贊云素花碧葉浮秀波面日中則向
日入還斂

附錄 金蓮出山西五臺山塞外尤多花色金黃七瓣兩層花
心亦黃碎蕊平正有尖小長狹黃瓣環繞其心一莖數
朶若蓮而小六月盛開遍地金色至秋花乾不落結子

如粟而黑葉綠瘦而長或五尖或七尖近時朱竹垞詩
云 紫府蕃神草金花近 帝牀獻非緣兔女恩許載
牙箱一束叨 殊數千金補藥方丁寧須什襲或恐夜
生光錢稼軒詩云不向池中映曉霞却疑布地有金沙
紅葉分譜疑妝別黃菊先秋浥露斜塞外亦知迎佛日
湖頭莫指是儂家若教拈入兜羅手應是維摩天女花
申笏山詩云彷彿銀塘植亭亭塞水壩自舒明月夜偏
映夕陽川寶炬傳鰲禁華芝緬鶴田文殊方示現處處
湧金蓮

湧金蓮

附錄

木蓮葉似辛夷花類蓮香亦似之仲夏作花生峨眉山

中諸谷心州亦有二株邛州亦有之雲南大理府有樹
高大葉如枇杷花如蓮有青黃紅白四種黃山志華嚴
堂前木蓮九瓣白色紫縷朱實含苞內苞開實如珊瑚
新琢宋景文贊曰葩秀木顛狀若芙蕖不實而榮馥
馥其敷唐白樂天詩云如折芙蓉栽旱地似拋芍藥挂
高枝雲埋水隔無人識唯有南賓太守知紅似胭脂膩
如粉傷心好物不須臾山中風起無時節明日重來得
在無已愁花落荒巖底復恨根生亂石間幾度欲移移
不得天教拋擲在深山又畫木蓮花圖寄元郎中云花
房膩似紅蓮朵艷色鮮如紫牡丹唯有詩人能解愛丹

青寫出與君看明宋景濂句云枝懸縞帶垂金彈瓣落
蒼苔墜玉杯吳晉翁廷簡句云龍象天家錫瑤花佛地
來池將空作水根以樹為臺近時袁子才詩云雲海盪
波濤一碧千萬頃蓮花認作池誤生高樹頂

附錄

石蓮花略同木蓮但彼九出此五出為異生山谷間唐
司空文明詩云今逢石上生本自波中有紅艷秋風裏
誰憐衆芳後

附錄

睡蓮葉如荇而大沈于水面其花布葉數重凡五種色
當夏晝開夜縮水底晝復出也與夢草晝入地夜即復
出相背見北戶錄

附錄 半邊蓮 小草生陰濕塍塹邊就地細梗引蔓節節而生

細葉秋開小花淡紅紫色止有半邊如蓮花狀故名又有天仙蓮搗葉敷毒雙頭蓮又名催生草

附錄 獨腳蓮 即鬼臼 一名羞天花 一名九臼 一名天臼 一名

鬼藥 一名解毒 一名爵犀 一名馬目毒公 一名害母草 一名术律草 一名獨荷草 一名山荷葉 一名旱荷 一名八角盤 一名唐婆鏡 生深山陰地葉六出或五出如鴈掌莖端一葉如繖旦時東向及暮則西傾蓋隨日出沒也花紅紫如荔枝正在葉下常為葉所蔽未嘗見日一年生一莖既枯則生一臼及八九年則八九臼然一年

一曰一曰生而一曰腐蓋陳新相易也葉如荷如盤如鏡亦有八角者故有諸名唐獨孤滔丹房鏡源云木律有二種根皆似南星赤莖直上莖端生葉一種葉凡七瓣一種葉作數層似蓖麻面青背紫而有細毛下附莖開一花狀如鈴鐸倒垂青白色黃蕊中空結黃子風吹不動無風自搖可製砂汞庚辛玉冊謂蚤休陽草旱荷陰草益部方物記易為羞寒花山谷詩注子瞻詩所記胡道士玉芝一名瓊田草即鬼臼黃麵如饅飽皮裹一曰吞之數日不饑啗三曰可辟穀今方家所用乃鬼燈檠耳宋景文贊云冒寒而茂莖修葉廣附莖作花葉蔽

其上以共自蔽若有羞狀山谷瓊芝軒詩云卓仙在時
養瓊芝深根固蒂活人命憧憧來問此何草但告渠是
唐婆鏡

附錄

觀音蓮即海芋一名天荷亦名羞天草高四五尺夏秋
間抽莖開花如一瓣蓮花碧色花中有蕊長作穗如觀
音像在圓光之狀故名根似芋魁大者如升盃長六七
寸而有根幹根皮不可食方家號隔河仙云可變金或
云能止瘡庚辛玉冊云陰草也葉極大可禦雨葉皆紫
色生江廣深谷澗邊

附錄

品字蓮天啓七年鄭州書院中開蓮花一枝如品字又

順治十二年十一月望日興國寺殿前夜湧花一枝如
佛手高可尺許表裏皆豎紋潔白似雪次日又湧一花
根有二上合為一色紋如前略似荷花二十五日又生
一花高三尺許大如箕下分上合色紋如前略似牡丹
或曰天花也見隴蜀餘聞

蘋花浮品也一名茱菜一名四葉菜一名田字草葉浮水面根連水底莖細于莖蒼葉大如拍頂面青背紫有細紋頗似馬蹄決明之葉四葉合成中折十字夏秋開小白花故稱白蘋其葉攢簇如萍故爾雅謂大者為蘋說文作蕒本草云葉徑一二寸有一缺而形圓者萑也似萑而稍尖長者蒼也花並有黃白二色葉徑四五寸如小荷葉而黃花結實如小黍角者萍蓬草也楚王所得萍實即此四葉合成一葉如田字形者蘋也又云蘋有三種大者為蘋中者為苻即蒼字小者如浮萍季春萍始生即此又云田字草俗呼破銅錢有水陸二種陸生者多在稻

田沮洳之處其葉四片合一與白蘋一樣但莖生地上
高三四寸不可食謂之水田翁項氏所謂青蘋即此召
南子以采蘋昏義芼之以蘋藻皆是唐于漢陽江南曲
云偶向江邊採白蘋還隨女伴賽江神衆中不敢分明
語暗擲金錢卜遠人張續之詩云搖漾越江春相將採
白蘋歸時不覺夜出浦月隨人許用晦句云蘋花繞郭
香皮襲美句云蘋花染衣白宋徐鼎臣詩云素艷擁行
舟清香覆碧流遠烟分_的的輕浪泛悠悠兩歇平湖滿
風涼運瀆秋今朝流咏處即是白蘋洲韓魏公長生蘋
云竒種穴仙草長生晉水蘋採芳曾著詠薦潔可供神

萬卉哀何速三冬色自新大年如欲較吾豈愧莊椿明
陳眉公詩云秋老蘋花貼岬開雪鷗一點夜飛來逢人
盡道游煙雨月白何曾獨上臺近時僧岑霽詩云翠葉
金花雜杜蘅湘湖千里最知名秋風颯颯過南浦鄉思
無端一夕生

附錄

萍一名水花一名水白一名水蘆一名藻季春生楊花
入水所化一名九子萍無根而浮有青萍紫萍麻藻明
楊雲鶴賦云嗟楊花之漠漠紛辭樹而綿綿乍飄颻於
幕底忽蕩漾於池邊雨過易質浸久移妍根無寸蒂葉
吐雙駢傍汀蘭而戢戢映岬草之芊芊魚驚跳而忽破

風漪歛而還連委柔姿子曉漲寄弱質子春田流潦凝
子並止歸波逝子均遷商羊舞子保世以滋大肥蠶見
子聚族而殲旃有似乎邊塞征人關河客子去國辭家
流行坎止意忽忽以何之惟蒼蒼之默使感茲萍質悵
此萍踪慨他鄉之萍梗憐知己之萍逢有如一枝暫棲
兩心密契不約而聯無根而蒂始宛轉而密依忽參商
而遙逝知宛在子水中恨長波之靡際嗟嗟每生有識
我輩鍾情欣由合起恨以離生雖離合之皆幻終悵快
而難平若夫合不心醉離不骨驚齊悲愉于一致反寄
羨無識之浮萍唐李巨川詩云二月虹初見三春蟻正

浮青萍合吹轉紫葉帶波流屢逐明神薦恒隨旅客遊
既能甜似蜜還繞楚王舟王摩詰詩云春池深且廣會
待輕舟迴靡靡綠萍合垂楊埽復開徐昭夢詩云為實
隨流瑞色新泛風縈草護遊鱗密行碧水澄涵月澀滯
輕橈去採蘋比物何名腰下劍無根堪並鏡中身平湖
春渚知何限撥破閒投獨蠶綸劉元弼商詩云春月秋
風老此身一瓢長醉任家貧醒來還愛浮萍草飄寄官
河不屬人皮襲美詩云嫩似金脂颺似烟多情渾欲擁
紅蓮明朝擬附南風信寄與湘妃作翠鈿陸魯望和云
晚來風約半池明重叠侵沙綠罽成不用臨池更相笑

最無根蒂是浮名僧可齋詩云盆池本不種青萍春杪
無根也自生人道一宵生九葉不知誰數得分明宋李
泰伯詩云盡日看流萍誰原造化情可憐無用物偏解
及時生泥滓根萌淺風波性質輕晚來堆岸曲猶得護
蛙鳴謝臯羽翺萍間穉荷詩云初萍半含絮頃刻開數
畝花生浮其間風雨足解后百年遊子心欲作千歲久
昔為浮萍根今為穉荷藕荷高刺已深魚遊觸其首離
離荷下萍吹向白魚口劉周崇師邵詩云乍因輕浪疊
晴沙又趁迴風擁釣槎莫怪狂踪易飄泊前身不合是
楊花明楊孟載詩云浮踪散寒星一夕生無數魚跳翠

乍開漚過青還聚微風和影去急雨連根露惆悵別君
時楊花滿衣絮薛君采詩云參差如霰布的皦似星出
魚戲影初開鳥散文仍密幸因雲雨會且免風波失無
禪江海流徒謝芳菲質日本貢使詩云錦鱗密砌不容
針只為根兒做不深曾與白雲爭水面豈容明月下波
心幾翻浪打應難滅數陣風吹不復沉多少魚龍藏在
底漁翁無處下鈎尋近時金子青新萍云差比田田貼
水荷勻圓新樣竟如何一絲別浦牽難定幾葉荒池聚
未多自省前身應墮地尚無斷梗去隨波來朝渡口舟
橫處風約青痕徧綠蓑蔣心餘蓮陂塘詞云寫秋光難

尋匹練濕銀猶被輕蓋不放樓臺浸空濶換了荷花世
界烟水碍待翦出鷗波那有并刀快黏天無賴怕鋪滿
明河誤他烏鵲接翅碧雲外遮掩處牽惹荇釵菱帶凌
波韞子偷晒鏡裏山痕無一點誰見秋釀眉黛飄泊債
有蕩子離妻種種傷心在許多機械算蛟落寒曾蟹迷
新斲更比經羅壞

附錄

藻爾雅荈牛藻博雅交菜藻也水草有二種水藻長二
三寸兩兩相對生即馬藻也聚藻葉細如絲節節連生
即水蘊也俗名鯁草又名牛尾蘊召南于以采藻書曰
藻火今屋上覆椽謂之藻并取以禳火也亦曰綺菲及

謂覆海亦謂魚頂青田溪生水藻名曰魚倉上林賦唼
喋菁藻唐郭季平元超賦句云生不擇所長亦無叢不
資潤于微露不懼威于勁風又云則知乘流則遊過坻
則植柔而能全弱而能直其為隱也不居高而處卑其
為謙也常韜光而晦色

附錄

荇一名苦菜一名鳧葵一名水葵一名苦公鬚一名荇
絲菜一名水鏡草一名孳一名屏風一名靨子菜一名
金蓮子一名接余葉紫赤色似蓴而尖徑寸餘浮水面
根大如釵股夏月開黃花亦有白花實大如棠梨周南
參差荇菜招魂紫莖屏風洞冥記有連錢荇荇如錢紋

梧溝雜佩謂熟煮其味如蜜曰荇酥白莖肥美可以案
酒唐杜少陵句云春光淡沲秦東亭渚蒲芽白水荇青
又云水荇牽風翠帶長曹鸞臺唐句云迎風細荇傳香
粉崔湘飄句云荇花初沒舸行時宋梅聖俞詩云荇葉
光於水鉤牽入遠汀淺黃雙蛺蝶五色小蜻蜓老去懷
江女飄浮笑楚萍西風莫苦急孤蕊有餘馨

附錄

菰一名菱草一名蔣草蒲類也又名菱白白芽如笋一
名蘆蔬又名菰菜根生水中漿可釀酒八月開花如葦
至秋結彫胡米一名菱米一名雕蓬一名彫菰一名蔣
可以為飯周禮魚宜菰大招設菰梁只上林賦蔣苕青

蘋梁沈休文詩云結根布洲渚垂葉滿臯澤匹彼露葵
羹可以留上客唐杜少陵句云滑憶彫胡飯香聞錦帶
羹又云秋菰為黑穗精鑿成白粲宋劉屏山茭筍云秋
風吹拆碧削玉茹芳根應傍鵝池發中懷灑墨痕放翁
鄰人送菰菜云張蒼飲乳元難學綺季餐芝未免饑稻
飯似珠菰似玉老農此味有誰知朱子茭筍云寒茭翳
秋塘風葉自長短剗心一飽餘并得牀敷軟近時王漁
洋題畫云白波青嶂非人境憶住江南過五年今日長
征老鞍馬菰蒲春雨夢江天朱子坦芟池云小沼魚爭
躍長林鳥自呼冥濛烟雨裏秋色滿菰蒲金醉墨菰首

云憐他白蔣正萋萋有首皤皤玉版齊俯仰池邊霜影
潔蓬鬆江畔月光迷蓴絲延頸原殊色蘆絮垂頭索共
題草亦如新文甚好風飈莫使脆於梨

附錄

蒲爾雅莞苻薤其上萬注今西方人呼蒲為莞蒲萬謂
其頭臺首也江東謂之苻薤中莖為萬用之為蓆是草
之美者故禮有蒲璧叢生田間莖可六七尺三脊無葉
如薤王風不流束蒲小雅下莞上簟宋謝宣城蒲生行
云蒲生廣湖邊託身洪波側春露惠我澤秋霜緝我色
根葉從風浪常恐不永植攝生各有命豈云智與力安
得遊雲上與爾同羽翼又詩云離離水上蒲結水散為

珠閒厠秋菡萏出入春鳧雛初萌實雕俎暮蕊雜椒塗
所悲塘上曲遂鑠黃金軀梁元帝賦得蒲生我池中云
池中種蒲葉葉影蔭池濱未好中宮薦行堪隱士輪為
書聊可截匹柳復宜春瑞葉生苻苑縷碧獻周人唐李
太白魯東門觀刈蒲云魯國寒事早初霜刈渚蒲揮鋤
若轉月拂水生連珠此草最可珍何必貴龍鬚織作玉
牀席欣承清夜娛羅衣能再拂不足素塵蕪昌黎青青
水中蒲云青青水中蒲下有一雙魚君今上隴去我在
與誰居青青水中蒲長在水中居寄語浮萍草相隨我
不如青青水中蒲葉短不出水婦人不下堂行子在萬

里徐昭夢詩云濯秀盤根在碧流紫英含露向晴抽編
為細履隨君步織作輕帆送客愁踈葉稍為投餌釣密
叢還碍採蓮舟鴛鴦鷺鷥多情甚日日雙雙繞傍游陸
魯望種蒲云杜若溪邊手自移旋抽烟劍碧參差何時
織得孤帆去懸向秋風訪所思宋徐竹隱詩云圓蒲相
將結僧夏荷葉蒲茸綠相亞浮花浪葉自飄零小院迴
廊正瀟灑葉如青幄花成茵細腰起舞來送春紙光如
銀墨如漆落筆四座驚有神輕衫短帽付餘子花前醉
倒輸閑人王介甫蒲葉云蒲葉清淺水杏花和暖風地
偏緣底綠人老為誰紅近時董竒廬元度詩云青青水

中蒲瀲灩蒲邊水一夜浸蒲根明朝幾千里先伯祖蓮
坡公蒲筍夢橫塘詞云嫩逾春藕瘦減秋菰釘盤常記
三月玉版同叅較籬外貓頭無別展葉青青含苞短短
艤舟爭拔任輕筐載取市滿街頭好供給晨飡潔安顏
已覺侵衰嘆先零似柳對爾愁結薄味充腸也勝似烹
葵煮蕨更休問周菘庾韭俊味山中自誇絕釋箸遙思
此君風味住江鄉知得陳元孝蒲團云蒲簞圓如月茅
齋寒似冰難將幽獨意舉似住山僧暗淚續清曉朗吟
枯夜燈閒來看坐處書破一層層錢竹初蒲履云本是
離離葉名更不惜竒織從塘上便曳近澤陂宜漫憶青

絲美無勞雜采施消炎知幾兩拋擲也隨時又有香蒲
一名甘蒲一名醮石春初生嫩葉出水時紅白色茸茸
然至夏抽梗于叢葉中花抱梗端俗謂之蒲槌亦曰蒲
萼花其蒲黃即花中蕊屑也細如金粉又有蘋爾雅蘋
萬董狀似蒲而細可為屨為絢為索

附錄

海藻爾雅蓴海藻一名海蘿一名落首一名薄生海島
上黑色如亂髮葉大如藻有馬尾藻大葉藻二種又有
海帶生東海水中似海藻而麤柔軟而長可食又有昆
布一名綸海中草生有象綸組者爾雅云綸似綸組似
組

附錄

蘼草一名蘼菜一名蘼榮生水旁似澤瀉而小花青白
色亦堪蒸啖

菱花陰品也。一作蔞。一作菱。一名芰。兩角者菱。三角四角者芰。爾雅云：菱，蕨，攢。俗呼菱角。楊慎以芰為雞頭，誤。一名水栗。一名沙角。秦人謂之薺。菰生水澤中。種陂塘者為家菱。葉實俱大。野生者小。皆三月生。蔓延浮水上。葉扁而有尖。光面如鏡。葉下之莖有股如蝦股。一莖一葉。兩兩相差如蝶翅狀。五六月開花。黃白色。實肥美。其色有青有紅有紫。有無角者。其色嫩青老黑。又有皮嫩而紫色者。謂之浮菱。又有兩角彎卷如弓形者。謂之烏菱。其花晝合宵炕。隨月轉移。猶葵之向日。李惟熙曰：芰花開向日。菱花開背日。故芰暖而菱寒。洞冥記有青冰菱。

翔雞菱拾遺記有紫菱西陽雜俎有瓜洲紅菱廬陵詩
注京師賣五岳宮菱楚詞製菱荷以為衣蓋菱葉雜蓮
荷葉博大有為衣之象也爾雅翼昔人取菱花六觚之
形為鏡埤雅群說鏡謂之菱花以其面平光影所成如
此庾子山鏡賦照壁而菱花自生是也三柳軒雜識以
菱花為水客梁簡文帝採菱曲云菱花落復含桑女罷
新蠶桂棹浮星艇徘徊蓮葉南江洪和湘東王采菱曲
云風生綠葉聚波動紫莖開含花復含寶正待佳人來
唐李巨川詩云鉅野韶光暮東平春溜通影搖江浦月
香引棹歌風日色翻池上潭花發鏡中五湖多賞樂千

里望無窮。儲太祝句云。濁水菱葉肥。清水菱葉鮮。義不
遊濁水。志士多苦言。錢仲文江行無題云。細竹漁家路。
晴陽看結罾。喜來邀客坐。分與折腰菱。劉夢得採菱行
云。白馬湖平秋日光。紫菱如錦綵鴛鴦。盪舟遊女滿中
央。採菱不顧馬上郎。爭多逐勝紛相向。時轉蘭橈破輕
浪。長鬟弱袂動參差。釵影釧文浮蕩漾。笑語哇哇顧晚
暉。蓼花綠岫扣舷歸。歸來共到市橋步。野蔓繫船萍滿
衣。家家竹樓臨廣陌。下有連檣多估客。攜觴薦芰夜經
過。醉踏大隄相應歌。屈平祠下沅江水。月照寒波白烟
起。一曲南音此地聞。長安北望三千里。白樂天採菱云。

菱池如鏡淨無波。白點花稀。青角多時。唱一聲新水調。
謾人道是采菱歌。宋林和靖句云。含機綠錦。翻新葉滿。
筐。青銅瑩古花。蘓子由食菱云。野沼漲清泉。烏菱不直。
錢。蟹肥螯正滿。石破髓方堅。節物秋風早。樽罍夜月偏。
令人思淮上。小舫藕如椽。范石湖田園雜興云。采菱辛。
苦廢犁鉏。血指流丹鬼質枯。無力買田聊種水。近來湖。
面亦收租。誠齋食菱云。雞頭吾弟藕吾兄。頭角嶄然也。
不爭白壁中藏烟水。悔紅裳左袒雪花明。一生子木非。
知己。千載靈均。是主盟。每到炎官張火傘。西山未當聖。
之清。又食老菱有感云。幸自江湖可避人。懷珠韜玉冷。

無塵。何須抵死露頭角。荇葉荷花老此身。又菱沼云。柄
似蟾蜍股樣肥。葉如蝴蝶翼相差。蟾蜍翹立蝶飛起。便
是菱花著子時。近時葛信天正笏紅菱云。紅菱正美喜
分甘。采采新從碧玉潭。莫訝鄉心又撩亂。果然風味是
江南。藕香亭外晚風過。暑退涼生試薄羅。秋月明空秋
水碧。倚闌還聽采菱歌。張少儀鳳孫采菱云。江南六月
看采菱。荷衣雪腕輕。橈憑錦。颿涇裏。擢烟入滿身。風露
寒。凌兢曼歌一聲。蟾魄上紫莖。綠葉牽朱繩。十年書劍
去鄉國。鴛鴦舊夢空。飛騰直沽旅食。又長夏消渴。不耐
炎熇。蒸水西主人辱存問。側生五十新荷。承清香撲人。

光照眼奚奴觸手愁霜稜鶴留丹頂鷹爪細一彎茜影
湘波凌玫瑰輕劈水仙佩玉膚映徹冰壺冰吳儂得此
乃狂喜傳箋遍集諸賓朋古瓷擊出佐芳譙涼飈淨埽
窺盤蠅滄洲法釀瀉百斛靈池故實還同徵都忘蹤跡
滯燕土但覺塵翳消胸膈哀黎縹李世豔稱蔗漿櫻實
瓊筵登獨遺此品在烟水邈如釣瀨逃巖陵天涯相賞
有知己不辭千里扁舟乘孤根近託竊香榭白蘋掩映
溪流澄芳鮮只供騷容嗜聲價豈要皇都增尊前一笑
宛舊識領略風味當年曾願携巾拂坐風檻嬌紅婉翠
圍千層尖斂渺綿吳語軟卜夜更命張華燈酒酣潑墨

進吳諺眷蚓十丈書枯藤閨秀錢冠之菱角餃云誰採
青冰著意調當筵風味劇難消怪他圭角渾如許纔到
庸中便折腰宋張功甫鵲橋仙詞云連汀接渚縈蒲帶
藻萬鏡香浮光滿溼烟吹霽木蘭輕照波底紅嬌翠婉
玉纖採處銀籠攜去一曲山長水遠彩鴛雙慣貼人飛
恨南浦離多夢短近時陳其年采菱泛清波摘遍詞云
花窺鏡盒蔓匝鞞紋十里西風公路浦憑將舴艋小織
煙潭葦花舞低寒取涼欺鴨脚嫩壓雞頭肯似碧房蓮
蕙苦淺泊前汀并買秋鱸炊火同煮斜陽渡晚來誰迎
水橋暝色隔村人語詎意前遊微茫竟隨客減鴈程去

瑟瑟板渚輕波濛濛篷船踈雨一自采菱歌斷謝孃何
處吳穀人摸魚兒詞云啓晴奩鏡波圓滿搖花低淬鉛
水斜陽幾棹鴛鴦外能稱采香人意羅韉底怕瘦入西
風角褪胭脂細清歌又起看月軟烟平一繩橫界打槳
露華裏湖濱好相見呼伊藕弟嘗來微沁冰齒分堆小
剝青瓷雪歸夢六橋誰記重九矣已半折魚租半佐菜
莢醉涼雲盛碎漸股老蟾蜍葉銷蝴蝶損了故灣翠

附錄

芡一名雞頭北燕謂之菝一名烏頭一名鴈喙一名鴈

頭一名鴻頭一名雞壅一作靡一名卵菱見管子一名薦

子一名水硫黃見東坡雜記莊子藥也其實莖也桔梗也雞

靡也豕零也是時為帝者也何可勝言生水澤中葉貼
水大于荷葉皺皮如穀戲衄如沸面青背紫俗名雞頭
盤莖葉皆有刺莖長丈餘有孔有絲嫩者剝皮可作蔬
五六月開紫花花開向日結苞外有刺如蝟花在苞頂
如雞喙內有斑駁軟肉裹子纍纍如珠璣殼內白米狀
如魚目薏苡大唐無名氏雞頭云湖浪參差疊寒玉水
仙曉轉鉢盤綠淡黃根老粟皺圓染青刺短金罌熟紫
羅小囊光緊蹙一掬真珠藏蝟腹叢叢引蒲傍蓮洲滿
川恐作天雞哭宋歐陽文忠初食雞頭有感云六月京
師暑雨多夜夜南風吹芡嘴凝祥池鎖會靈園僕射荒

陂安可擬爭先園客採新苞剖蚌得珠從海底都城百
物貴新鮮厥價難酬與珠比金盤磊落何所薦滑臺潑
醅如玉醴自慚竊食萬錢厨萬口飄浮嗟病齒却思年
少在江湖野艇高歌菱苳裏香新味全手自摘玉潔沙
磨軟還美一瓢固不羨五鼎萬事適情為可喜何時遂
買頰東田歸去結茅臨野水蘓子由食雞頭云芡葉初
生縐如縠南風吹開輪脫殼紫苞青刺攢蝟毛水面放
花波底熟森然赤手初莫近誰料明珠藏滿腹剖開膏
液尚糝糊大盍磨聲風雨速清泉活火曾未久滿堂坐
客分升掬紛然咀嚼惟恐遲勢若群雛方脫粟東都每

恍會靈沼南國陂塘種尤足東遊塵土味應嫌此物秋
來日常食陶商翁詩云三伏池塘沸雞頭美可烹香囊
聯錦破玉指剝珠明葉皺非蓮蓋根甘似竹萌不應徒
適口炎帝亦曾名姜文舉特立詩云芡實遍方塘明珠
截錦囊風流薰麝氣包裹借荷香放翁詩云鄉國雞頭
買早秋綠荷紅縷最風流建州城裏西風冷白棗堆盤
看却愁楊誠齋食雞頭云江妃有訣煮真珠菰飴牛酥
軟不如手擘雞頭金五色盃傾驪頷琲千餘夜光明月
供朝嚼水府靈宮恐夕虛好與藍田殮玉法編歸辟穀
赤松書三危瑞露凍成珠九轉丹砂鍊不如鼻觀温芳

炊桂歇齒根軟熟剝胎餘半甌鷹爪中秋近一炷龍涎
文室虛却憶吾廬野塘畔滿山柿葉正堪書又雞頭云
龍宮失曉惱江妃也養鳴雞報早暉要啄稻梁無半粒
只教滿頷飽珠璣鄭安晚句云玉質欲藏如許脆鐵芒
何苦太尖生王巖叟句云水晶冷浸碧玉叢琉璃湧出
青毛蝟金王拙軒詩云竹爐新煮軟木几咀嚼寧憂齒
頰乾誰認鼈胎剝玉彈共驚鮫室泣珠盤芋頭有味終
難永菱角齊名不奈寒喚起舊年風月興惜無千丈酒
腸寬近時陳寶所詩云綵幘映清波森然雜芰荷蝟毛
攢刺密鮫淚得珠多夕浦挈音起遙天暑雨過炊菰香

總遜一飽願無他宋昭順老人浣溪沙詞云的爍堪為
席上珍銀鐺百沸麝臍熏蕭娘欲餌意中人拈處玉纖
籠蚌顆剝時瓊齒嚼香津仙郎入口即身輕近時陳其
年泛清波摘遍詞云江妃水戲龍女夜游遺下鮫盤波
面貯勻圓鬆軟顆顆枝頭綻新雨誰家女粉裙一色銀
浦三更船泝空明烟外語為愛鮮妍爭向微茫遵岸尋
取寒宿莽苞作蝟毛暗磔實愛雞頭初乳剖罷萬斛晶
丸零亂川滸添嬌嫋那數雲子彫菰偏宜玉纖幽俎祇
怕如珠秋露採時休誤吳穀人摸魚兒詞云颭西風釵
莖小立一羣烟筏來處年時港口和菱種生就紫盤擎

露花可數記薄暖低烘開徧斜陽路芳洲又暮伴大芋
高荷團團縐綠萬葉鬧涼雨蓮歌罷采采兒童隔浦歸
來盈斗堪煮青吭漸少菰蒲寂夢穩者時鷗鷺鮫女妬
算多少真珠緊戲羅囊護秋燈酒戶乍剝出勻圓宮黃
新褪點點認酥乳

慈姑花時品也一作茨菰一歲根生十二子如慈姑之乳
衆子故名爾雅翼云歲有閏則生十三子一名藉姑廣
雅曰酢姑一名水萍一名河鳧苾一名白地粟苗名剪
刀草一名翦搭草一名燕尾草一名槎了草莖榦似嫩
蒲又似三稜苗甚軟色青綠每叢十餘莖內抽出一兩
莖上分枝開小白花四瓣蕊深黃色根色白而瑩滑如
杏如粟宋楊東山茨菰花云折來趁得未晨光清露晞
風帶月涼長葉剪刀蘆不割小花茉莉淡無香稀疎略
糝瑤臺雪升降常涵翠管漿恰恨山中窮到骨茨菰也
遣入詩囊近時家初白詩云舊葉復新葉碧莖忽抽芽

誰將綠翦刀剪出白玉花水邊有秋意涼蝶來西家

附錄

勃臍一名芍一名鳧茈一名鳧茨一名黑三稜一名地

栗舊名烏芋因其形似臍故名生淺水中一莖直上無
枝葉狀如龍鬚色青秋後結根大者如山查栗子臍有
聚毛纍纍下生入泥底野生者黑而小種出者皮薄而
色淡紫肉白而大軟脆可食皮厚色黑者謂之猪勃臍
皮薄色紫者謂之羊勃臍明吳匏菴題勃臍畫冊云纍
纍滿筐盛上帶葑門土咀嚼味還佳地栗何足數王于
磐鴻漸題野勃臍圖云野勃臍生稻畦苦嫖不盡心力
疲造物有意防民饑年來水患絕五穀爾獨結實何纍

纍

附錄

甘蔗

一作芋蔗 一作干蔗 一作都蔗

叢生莖似竹內實直理有節

無枝

八九月收莖糖霜譜云杜蔗

即竹蔗

白蔗

一名荻蔗 一名芳蔗

一名蠟蔗

西蔗紅蔗

即紫蔗亦曰崑崙蔗

又有子母蔗扶南蔗荔蔗等

種古有蔗漿蔗錫唐鄒和尚始有蔗糖為霜之製司馬

相如子虛賦謂之諸柘張衡南都賦謂之諸蔗凡草木

皆正生蔗獨橫生故從庶閻婆有如脛之蔗七名有盈

丈之名糖曰蔗胎一號蔗霜一號右蜜又曰銷醉又雜

以紫衣根作酒曰蔗酒宋舒信道詩云瑤池宴罷玉母

還九芝飛入三仙山空餘絳節留人間雲封露洗無時

閑節旄落盡何爛斑野翁提攜出茅管吳刀憂憂鳴雙
環截斷寒氷何孱潺相如賦就空上林倦遊渴病長相
侵劉伶愛酒真荒淫狂來欲倒滄溟深此時一嚼輕干
金壚邊何用文君琴五斗一石安足斟坐想毛髮生青
陰蕭瑟甘滋欲誰讓粗梨橘柚紛殊狀冷氣相擲杯盤
上顧郎不見休惆悵佳境到頭還不妄詩成雖愧陽春
唱全勝乞與將軍杖近時吳敦復城以青皮蔗送厘浦
詩云五挺休嫌少來從下若街到頭誇老境入口沁幽
懷色合松筠伴長應著作儕甘分小兒女流液濺空階
杭厘浦答云五尺青皮蔗修莖較我長替持綠玉杖交

映翠羅裳惠好光盈把分甘齒溢漿清閒覲晚境故遣
老夫嘗陳其年咏窩絲糖摸魚兒詞云裊春燈赤瑛盤
內絲絲縷縷難理平生說餅題糕興慣與羣兒爭嗜銅
駝市曾趁徧賣錫小擔簫聲底何曾見此總輸與筵前
輕鬆纖軟弱雪不勝齒摩挲罷髣髴夢華小記依稀南
內遺製當初赭帕低籠處分賜龍孫鳳子今何似似宋
嫂魚羹又似楊妃荔天家往事也不信宮娥曉寒呵手
搓得恁般細褚石農甘蔗丞相詩云搯笏垂紳巧樣裘
儼然顯者位行藏口甜多媚徵甘草脾蜜趨炎飽蔗漿
盧杞

形容差可擬九齡風度豈堪方賢奸何代無丞相

伴食惟君喜氣長
琢成腰帶具冠裳
初置華筵態度揚
滿腹甜甜如蜜結
舉身津液似糖霜
爐香繚繞清宵永
銀燭繽紛待漏長
蔗老彌甘徒自慰
朝來消瘦減容光